

方術志

後漢書方術傳凡醫卜陰陽風角皆著於篇小道可觀一技一能
在所不遺方術莫重於醫漢書藝文志敘爲四種分醫經經方
房中神仙誠重之也縣中業醫者分內科外科舊志缺載久遠
者不可考以耳目所接者言之近城有西鄉洞曹道篤父子大
倉脚曾德源陳家村曾捷三及其子昭鳳清明塘曹泮朋紫營
坳劉宏材皆業內科然不詳其事實無醫案遺著未能立傳夫
士人讀書無成據坊本流傳醫書藉治病謀生者鄉村多有之
輕微之證頗效重大疑難之證則束手矣漢書引諺曰有病不

宜章縣志

廿七卷

方術志

治常得中醫誠慨乎其言之也外科率由師授符咒止血能者
可奏效於數十里外其理不可解時人驚於西醫之技術輒揚
外而抑中此與耳食何異哉外科之藥取之原野山林收效極
速其名率不在本草經夫藥生於山而聚於市加以炮炙謂之
熟藥而非所名產之處輒僞以亂真或糞種以求售故藥弗得
良外科採藥山澤謂之草藥縣中多山除僂蒼腦麝珍品外何
藥蔑有惜不能名而傳之傳亦且種而僞之矣業內科者多士
人外科則否人皆重內科酬金多厚外科則否外科姓名多不
可考內科知名者亦鮮

繪畫亦藝術之一也工匠之畫無足道士人之以畫名者近世



若吳南橋之竹彭德煥之魚蕭祖修之寫生吳嶽之花卉亦可
觀皆近城人也白沙則黃拔貢文煒歐陽茂才堦之畫蘭歐陽
智山之畫山水亦有致然非專家信手塗抹以應人求者也
祿命堪輿二家縣中多有之大率因人貴後而追論其祿命因
家盛後而推求其先塋唐呂才已有論闢之茲不具論相傳縣
北摺嶺市有一大屋四方皆開門云其祖精堪輿遺言逢某干
支則開某方門以迎王氣然其家至今式微其術亦可知矣
蕭洪治字自本少秉竒質讀書洞見根柢究天人性命之旨曉
音律精易象邵子皇極經世諸書慕諸葛武侯元文靜明劉誠
意伯更號三式明天啟末草竊四起棄舉業隱於堪輿家遍遊

宜章縣志

廿七卷

方術志

二

閩粵吳淞又號傘屐主人嘗至桐城爲張相國英程太史芳朝
占家宅各賦詩贈之名重一時鼎革時却吳三桂之聘挈家人
常寧取河圖中宮之數築舍曰五十居又號太乙著周易復古
明易圖學易圖諸種行世常寧縣志有傳舊志按四庫全書提要六壬大全篇謂六壬與遁甲太乙世謂之三式洪治之號當以此原說非

蔣玉奇字元妙留軍洞人常遇異人授以法術縣南五里冲有
妖作崇玉奇治之遂絕康熙間歲旱攝縣令何某邀之禱雨禹
步作法俄頃雷雨大作歲有秋舊志

蕭承文字名科邑庠生精青鳥奇門遁甲占卜之術挾技遊蜀
逆旅主人羅齋成其先人亦我縣人羅塋父自以爲得牛眠地

承文相之以爲不吉勸改遷啓土則棺中有物蠕動若鱗無目
睛秋旱鄉人就承文占之謂某日午當雨至其日晨無片雲午
果滂沱其他奇中類如此嘗緘書寄子言家宅不利某年月主
喪六畜多瘦死既而果然其子赴蜀迎之歸路有盜劫以行李
付其子自携鋤橐戒之曰百步外勿反顧我遂行子前行遇盜
以行李蕭索哀之得免嘗自言術非由師授精思十二年忽夢
金甲神指示遂有得

薛祥泰字光海號連山樓下人性豪爽精岐黃術針灸解剖如
神人以華陀目之有就其家求醫者卽爲施治并贈藥款以酒
食好施與周濟孤貧由里田至九峯山路五十餘里慨捐鉅貲

宜章縣志

廿七卷

方術志

三

鳩工修築其他若石亭村前橋路柳境真仙橋涼亭費數千金

并捐施茶田十餘畝

近年里田九峯間路甚崩壞由周毅募捐數千元鳩工修補并捐貲施茶附錄於此

歐陽煥字得照長策人清增生精醫術不待切脉望色聽聲知
人生死一日於路見村婦氣色異常驚問爲誰家婦夫安在婦
具告之時其夫在數里外教書煥曰汝至明日午刻必死速喚
汝夫歸遲無及婦時無恙怒以爲咒已也次晨復詣問之始驚
懼喚夫回至午病驟作竟死煥應童子試主試者病煥爲診治
以大釜煎藥下咽卽瘳主試脫貂裘贈之遺著醫書用之輒效
歐陽涵瑛字河瑞長策人精占冢宅有長漣村人胡某延相地
問何欲云欲速富涵瑛謂欲速則成就小三年內當有驗後果

如所言有族弟名周之者妻死擬渴葬村旁涵瑛曰葬此十日
內必有凶徵不聽至十日其媳果以產難死村中有白蟻爲害
族人請除之即携羅盤登門樓周視將子癸方牆改低尺餘又
於良方掘一池工甫竣三日白蟻成羣飛去涵瑛家初饒裕後
貧家有債券數十紙慨然曰是區區者留何爲即焚之有來償
者則曰券已焚矣拒不受

揚光紅字若震平和月梅村人因以月梅爲號少聰敏弱冠補
縣學生員性高曠不屑帖括學絕意科舉以詩酒書畫自娛草
書學張旭僧懷素坐卧一小樓晨夕臨摹不下樓者歷十餘年
故紙棄置樓窗外厚積恒數尺雨則溝水盡黑名重一時遠近

宜章縣志

廿七卷

方術志

四

求者無虛日晚年目眊猶能作草書益遒勁從子某侍側濡染
伸紙則佳易以他人則否光紅沒後零縑斷楮得之者珍若拱
壁所書積存數篋臨卒以遺子誠曰此亦千金產毋輕予人諸
子不知愛惜拉雜摧燒存者無幾貧甚有孫適他村以一紙裹
物識者以金易之始悔忘向遺命也搜篋中餘楮出售得重貲
周世均字作雲多材藝工繪畫凡山水動植物描寫逼真畫葡
萄尤精清咸豐間粵匪寇湘繪地圖並獻防剿策於當道切中
機宜奏給六品銜

鄧德昌下臺樓人父故精醫少傳家學隨父出診終身益富斷
人生死時日不爽常至漿水黃氏數次病家出舊方曰方不誤

惟分兩輕耳爲之加重即效尤精小兒科活人無算
曾傳鏞字光海家南關精醫求診者盈門縣令麻維緒贈萬家
甘雨額以子岑漳官封武騎尉
陳名宦監生例贈修職郎業醫兼精內外科貧者施診或代償
藥值其他善舉亦多